



МЕСЯЦА ОКТЯБРЯ В 19-й ДЕНЬ

Святаго пророка И́оилья и святаго мученика У́ара

Стихиры пророка, глас 8.

Подобен: **О** преславнаго чудесе:

Божественный Дух излияся, / яко честный
И́оиль, пророчествуя, сказа, / от Него́ движимъ,
на ны, верующия, / и тайнам Божественным явлé-
ние открывáет, и пророчествуют, / иже дéйстви-
Его́ приéмшии, / и Божественною зарéю
просвещáеми, / и Божественною благодáтию.

Боговещания исполнен дивный И́оиль, / яко
истóчник, исхóдит, дúши напáяющий, / от дóму
Твоегó, Влады́ко, / весь слáдость нам иска́па, /
помышлénия ослажда́ющую, / весь вы́сок быв
дúхом, / добродéтелию возносимъ к Божественней
высотé.

Пророческим дерзновением твоим / и разум-
ным к Бóгу, И́оиле, приближéнием, / имже Небéс-
ная зрishi видéния, / о нас Тогó умилостиви, /
соверша́ющих véрою пáмять твою́, / разрешéния
прося́ прегрешéний, слáвне, / и причáстия Божé-
ственных наслаждéний, / и вéлия мило́сти.

Ины стихиры, мученика, глас 6.

Подобен: **В**се отлóжше:

Страдания вíдев добропобédных мучеников, /
дерзновéния Божественнаго исполнен быв, /
вшел еси́ на тризнице / и Христá, У́аре, нас рáди
Человéка бývша, / проповéдал еси́, не устрáшив-

ся смёрти, / ниже подлежащих мучений. / Тем уязвляемъ и немилостивно раздробляемъ, / радовался еси совершеннымъ разумомъ, / смотря, мудре, пребывающее доброславие / Бóга возлюбившимъ.

Плòти с кровьюи, падающия видя, / и яко инóму страждущу, страдальче, / пребывал еси доблественнейше: / привязан бо ко древу, / терзания терпел еси беззаконныхъ пожданнейше. / Богу же в рúки дух твой предал еси, / ужасив видящия тя непреклонными противленими. / Тем ты почитаемъ, / вельми мужествовавши, мудре, / и низложивши мучителя, / Уаре, болезнями твоими.

Помазующи мiры ты, чудная Клеопáтра / под зéмлю положи / и храмъ тебé святыи возсозда, / праздникъ творящи, дивне Уаре, / и верно ты молящи. / Еяже дeтище умному воинству причетал еси / и славою удобрil еси, / и ликомъ святыхъ сочетал еси. / Егóже части сподоби ны, / твоe совершающия благочестно торжество, / мучениче досточудне.

Слава, и ныне, Богородичен. Подобенъ тойже:

Радуйся, корене росный, / радуйся, жезле Аарóнов, / прозябый Цветъ неувядающий и присноживый, / благоплодный рай, Жизни древо, / из Иессеева корене, Чистая, / просиявши, Отроковице, / и земныхъ питаючи Хлeбомъ разумнымъ. / Радуйся, багряннице всечестная, / всех Царя Богоневесто, / вeнче всесветлый, / архиереевъ благолепие, / радуйся, Еди́на Пречистая.

Крестобогородичен. Подобенъ тойже:

Агница Своего Агница Нескверная древле / и Непорочная Владычица / на Древе Крестнемъ яко узре, матерски восклицаше / и, дивящися, вопияше: / Чáдо Сладчайшее, / что зрeние сие новое и преславное? / како сонмъ безблагодатный / судищу Пилатову предаде Тя / и осуждаетъ на смерть Живота всяческихъ? / но воспеваю Твое неизреченное, / Слове, снизхождение.

Тропарь пророку, гласъ 2:

Предвeдый Божие пришествие во плòти / и наитие Духа Святаго и грядущий Суд

предсказáвый, / пророче Ибиле: / спасай молитва-
ми твоими / чтущия тя от всех скорбей.

Тропарь мученику, глас 4:

Вóинством святых страсотёрпец страждущих
законне, / зря óнех, показáл еси мýжески кре-
пость свою. / И устремívся на страсть вóлею, / и
умрети возделé за Христа, / Иже приял еси
пóчень побéды твоего страдания, Уаре, / моли
спастися душам нашим.

Слава, и ныне,
Богородичен или Крестобогородичен.

НА УТРЕНИ

Канон октоиха един, и святых два.

Канон прорóка, егóже краегранесие: Пророчеством Ибиля
пророка дивлюся. Творение Феофаново. Глас 2

Песнь 1

Ирмос: Грядите, лю́дие, поим песнь Христу́ Бо́гу, /
раздélъшему море и наставльшему лю́ди, / яже изведé из
работы египетския, / яко просла́вился.

Лик нам прорóческий свеселится, / похваля́-
ему тебе небомúдренну, Ибиле Богогласе, / с
ни́миже спастися нам моли, блаженне.

Глаго́лы Бóжия предвозвещáя,
Богодухновénне, / лю́тый прорéкл еси́ гнев и
пράведный, / иже от нечестия прибывший лю́дем
твоим суемúдренным.

Чúдное, и светонóсное Дúха, и животворящее
вдохновéние тебе присени́ / и бúдущих знáние
вдохне́, / прорóче блаженнейше.

Богородичен:

Тя скíния свидéтельства прописá, многовídно
образúема, / являющи от Тебе воплощшагося
неизмéнно, / Богомáти Пречистая, Владычице.

Ин канон мученика, егóже краегранесие: Стрáсти похва-
ляю Уáра, славу великую. Иосифово Глас 6.

Песнь 1

Ирмос: Я́ко по сýху пешешествовав Изра́иль, / по
бэдне стопáми, / гонителя фараóна / видя потопляема, /
Бо́гу побéдную песнь / поим, вопияше.

Явйлся еси́ на высотé Христовы Цёркве,
Уáре, / я́коже солнце свётлое, / блистаньми прос-
вещáя твоих борéний, блаженне, земная исполне́-
ния.

Божественныя любви, всеблаженне, объят сладким рачением, / отвёрглся еси себе / и ко всякой муще плотстей устремился еси, / крепко подвизався.

Смысленно Божественных подвижник юзами связав себе, страстотерпче, / и лестныя разорил еси узы крепким терпением многих мук.

Богородичен:

Пресущественное Слово во Твоем чреве паче слова вселися и, родився Боголепно, / мученические лики, Чистая, приведи, / с нимиже песнословим Тя.

Песнь 3

Ирмос: Утверди нас в Тебе, Господи, / Древом умерщвлей грех, / и страх Твой всади / в сердца нас, поющих Тя.

Учими твоими мудрыми догматы, / пост, пророче, и служение благочестно проповедуем, / в дом Господень ходяще.

Твоим учением последующе от всего сердца и помышления, / плачем же и молитвами Бога взыскуем, достохвально.

Изъявив нам Всецедраго Владыки, пророче, долготерпение, / и Божественную же благостыню / изъяснил еси Того, и благодать.

Богородичен:

Зачала еси, Пречистая, Бога / и родила еси Слово, неизреченно воплощенное, / во пророчех главолавшее и исполнившее тех проповедания.

Ин

Ирмос: Несть свят, / якоже Ты, Господи Боже мой, / вознесый рог верных Твоих, Блаже, / и утвердивый нас на камени / исповедания Твоего.

Вшел еси разумом крепким в мужественныя подвиги, / утвердився надеждами будущих благих / и мучеников Христовых всемудрыми, блаженне, поучении.

Вбинство святых страстотерпец, страждущих законне зря, / оных показал еси мужескую крепость, / примешаяся многообразным, Уаре, мукам.

В полце свящѣнном, Уаре, яко дѣблій воин,
обрелся еси / и ссек множество мужества мечем,
мудре, ратным, / побѣдами славим.

Богородичен:

Дѣво Мати Божия, / моего уныния глубочай-
шую тьму и облаки страстей / просвещением, еже
в Тебѣ, молю Тя, благодати, отжені.

Кондак пророка, глас 4:

Просветившееся Духом чистое твое сердце /
пророчества бысть светлейшаго приятелище: /
зриши бо, яко настоящая, далече сущая, / сего
ради ты почитаем, пророче, блаженне Ибиле,
славне.

Седален пророка, глас 2.

Подобен: Стратотерщы Господни:

Богоглаголиве пророче, / вдохновением испол-
нивися Утешителевым, / изъяснил еси в послѣдняя
времена бывшее языком осияние. / Сего ради
ныне благочестно ты похваляем / и, твою память
совершающе, вопиѣм ти: / Христа Бога моли о
душах наших.

Слава, мученика, глас 1.

Подобен: Гроб твой:

Страсти честныхъ вѣдев мучеников / и тех
лобзавъ узы любвию, / на высоту востекл еси
свидѣтельства, всечудне, / на древе бо повѣшен,
раны претерпел еси, / дондеже в руки Господни
духа предал еси.

И ныне, Богородичен:

Упование христиан, Пресвятая Дѣво, / Егоже
родила еси Бога, паче ума и слова, / непрестанно
моли о воспевающихъ Тя / подати оставление
грехов наших всех и исправление жития, / верою
и любовью присно славящимъ Тя.

Крестобогородичен:

Зрящи Тя, Христе, Всенепорочная Мати, /
мертва на Крестѣ простерта, вопияше: / Сыне
Мой, Собезначальне Отцу и Духу, / что неизречен-
ное Твое сие смотрение, / имже спасл еси пречи-
стыхъ рук Твоих, Щедре, создание.

Песнь 4

Ирмос: Услышах, Господи, / слух Твоего смотрения, / и
прославихъ Тя, / Еди́не Человеколюбче.

Мілоствив б́уди, Господи,/ ч́исто к Тебе
ка́ющимся,/ я́ко един Щедр и Многомілоствив.

Якоже провозвестіл еси, сла́вне,/ от Бога
изліяся Дух/ на вся́ку плоть véровавших.

Снітіе Д́уха,/ ученикі́ Господни уму-
дрівшее,/ Твоя Богоглаго́ливая словеса́ испóлни.

Богородичен:

Избáвльшеса, Преч́истая, из мрачных áдовых
бокóв,/ Божéственным Твоим Рождествóм,/ Тя
ублажа́ем.

Ин

Ирмос: Христос мой сила,/ Бог и Господь,/ Честна́я
Церковь / Боголéпно поёт, взывáющи,/ от смысла ч́иста, о
Господе прáзднующи.

Святými я́звами удобряемь,/ красне́йший
яв́ился еси́,/ и Богу, Уаре, возлю́блен, Венча́вше-
му твой верх, досточ́удне.

На кресте́, сла́вне, растязáемь и на земли́
простира́емь,/ лю́тыя болéзни претерпéл еси́./
Тем неболéзненную жизнь наслéдовал еси́, весе-
ля́ся.

Закóнно видяще Божéственным мученицы
стра́ждуща тя, блаженне,/ терпéния словесы́
укреплáху,/ с н́имиже стра́сти дóлгия совершивъ,
ублажилъ еси́.

Хвала́ми венча́ем Божéственные мученики,/
яже венча́ благодáть Божéственная Божéствен-
ными увязéнии,/ низлóжших вра́жия высóкая
мудровáния.

Богородичен:

От т́ины страстéй, Влады́чице, возведи́,/ и
стра́стных помышлéний, отчужда́ющих мя Бóга
Еди́наго Ч́истаго,/ да véрою ублажа́ю Тя.

Песнь 5

Ирмос: Но́щи прешéдшей прибли́жися день,/ и Свет
ми́ру возсия́:/ сегó ра́ди хва́лят Тя А́нгельстии ч́ини / и
славослóвят Тя вся́ческая.

Христо́во пришéствие Ио́иль Божéственный
явственно всем проречé,/ я́ко придет и спасéт
род челове́ческий / от йдо́льскаго льщéния.

Весь ты возникнув, прорóче сла́вне, на преу́м-
ный же и в́ыше по́мысла Свет,/ прорóчества

благодать извлéкл еси́ оттúду / и правду проповéдал еси́.

О поющих́ ты моли́ся спасти́ от всякаго озлоблénия, / пребогáте Иобиле, / и Божéственныя благодáти и зарí сподóбитися, умоли́.

Богородичен:

Пресвятáя Дéво, Влады́чице мíра, / Ты, Богорóдицу, исповéдающим от безчíсленных грехóв моли́ спастíся и житéйских обстоя́ний.

Ин

Ирмос: Бóжиим свéтом Твоим, Блáже, / úтренюющих Ти дúши любóвию озари́, молю́ся, / Ты ведеги, Сло́ве Бóжий, / Истиннаго Бóга, / от мра́ка грехóвнаго зывáюща.

Укреплáешися мановéньми Божéственными / и неослáбная терзáния терпíши дóблим смýслом, Уáре, / растерзáя гóрдаго сéрдце, злóбу соделавшаго.

Слáвный мýченик, видя́ отпáдающия на зéмлю сво́я плóти, / рáдовашеся, вéчнуююча умá свéтлостию / и Божéственная воздáния предпрозира́я.

Пою́ Тя, Гóсподи Бóже, и славослóвлю, и покланя́юся, / благíх сподобл́яся, уготóванных Тебé возлю́бльшим, / мýченик в страдáнии тéпле зовя́ше.

Богородичен:

Явльши́ся Херувíм и Серафíм яко во́истину святéйши, Всенепорóчная, / вся, вéрно Ты ны́не освящáющия, освятí / и спасí ходáтайством Твоим.

Песнь 6

Ирмос: Бéздна мя мно́га грехóвная окружа́ет, / и вопию́ Ти, проро́ка подража́я: / от тли́ мя, Гóсподи, возведí.

Ка́плют твои́х глаго́л истóчницы, / Боговещáния и душепíщную слáдость точáще, слáвне, / напая́ющую вéрно приходя́щия.

Гóру ты прорóчества, слáдость источáющую, / и Богочéстия, Иобиле, проповéдника всемúдра зна́ем, / Богоглаго́ливе прорóче.

Богородичен:

Просветí, Свет Рóждшая незаходя́щий, / сердца́ славослóвлящих Ты верно, Пречíстая Влады́чице, / и из Тебé Рóждшагося неизречéнно.

Ин

Ирмос: Житѣйское море, / воздвизаемое зря напáстей бурею, / к тихому пристáнищу Твоему притѣк, вопию Ти: / возведи от тли живóт мой, / Многомилостиве.

Глаголов небрегл еси пребеззаконнаго врага / и пламень претерпел еси нестерпимых болезней терпеливно, многострадальне Уаре, / молебниче о хвãлящих тя верою.

Не престáше мучитель пребезумный, ранами немилостивно сдробляя тя, / дондеже в руки Божия священную твою душу предал еси, / добротами просвещшуся подвиг твоих.

Возвысился еси, подобясь на древе Христу, и на том вися, / твою душу предал еси Богу, ты венчающую, / страстотерпче, законно доблествовавши.

Богородичен:

Управи, Владычице, в пучине лютых, обуреваемую всегда смиренную душу мою, / и к тихому пристáнищу направи, / несомненным разумом Тя блажащую.

Кондак мученику, глас 4:

Христу последуя, мучениче Уаре, / Того испив чашу, / и мучения венцем увязеся, / и со Ангелы ликовствуеши: / моли непрестанно за души наша.

Песнь 7

Ирмос: Пещь древле всегремящую угасивый / и отроки тучею духовною оросивый, / благословен еси, Боже отец наших.

Исходящий от дому Господня и напаяющий источник, / якоже прорекл еси, произыде, / пророче всечестне.

Поток ситовный пшеницоносен соделал еси пшнный источник, / якоже Иобиль прорече: / благословен еси, Боже отец наших.

Богородичен:

Иже вся Сотворивый рождся от Девы, / спасе мир, благочестно поющий: / благословен еси, Боже отец наших.

Ин

Ирмос: Росодательну убо пещь / содела Ангел / преподобным отроком, / халдеи же опаляющее / веление Божие, мучителя увещá вопити: / благословен еси, Боже отец наших.

Просвещена ты подвигов приложеньми, / предобная Клеопатра, Уаре, скутала есть, / обретши славу тобою, веры достойну яве, / юже показа тепле в твоё скончание.

Изливаючи на ты слезы и мiры ты честными помазующи, / сокрывает ты под землю всечестная жена, / погребшаго прелесть лукавую и из гроба блистаными просвещаяща нас.

Не престайше, преподобне, угождаючи тебе Христову угоднику, приснопамятная, / дондеже явился еси ходатай ей, мудре, Царствия Небеснаго, / егоже сподобися тобою с любезнейшим сыном.

Богородичен:

Сокрушена мя безчисленными согрешениями, Дево, ходатайством Твоим обнови, / уврачующи мою душу и слово подаючи, вопити: / благословена, Яже Бога плотию рождающая.

Песнь 8

Ирмос: Древле оросившаго еврейския отроки в пламени, / и опалившаго, Господа, халдеи преславно в нем, / воспоём, глаголюще: / благословите и превозносите Его во веки.

Показал еси, славне, покаяния образы яве Благоутробнаго Господа, / приемлюща верою к Немю приходящия и поющия: / благословите дела Господня Господа.

Служитель быв ты Господень, пророче Иобиле, / Того тайны вручился еси прорицати людем, хвалящим и поющим: / благословите дела Господня Господа.

Оставление источают Иудови чудес реки, яже суть апостоли преславнии Господни, / якоже пророчествова Иобиль, вопиющих напаяюще: / благословите вся дела Господня Господа.

Богородичен:

Ипостась, сложну во двою существу, Христа, / Всенепорочная, родила еси, пребывши Дева Чистая, / Емуже поюще, зовем: / благословите дела Господня Господа.

Ин

Ирмос: Из пламене преподобным росу источил еси / и праведнаго жертву водою попалил еси, / вся бо творishi,

Христѣ, токмо еже хотѣти: / Тя превозносим во вся вѣки.

Матерних послушав, мучениче, молѣб, / Небесному воинству светло воинствуя, / отрока честнаго и твоего неотступна показал еси благославия / неизреченным милосердием.

От Египта ты богатство якоже многоценное принесѣ, мучениче, / разбогатыи многоценными дарми, / Клеопатра, целѣнии всю Палестину, / любовьи ты почитающую.

Веселяся, подвиги твои совершил еси, / воине доблий Вседержителя, / и яко победитель от Него венчался еси, Уаре всеблаженне, / мучеников великая славо.

Богородичен:

Грехи прилагаю ко грехом и будущаго не боюсь Страшнаго Суды: / победи, Чистая, души моея ослепление / и, мольбою Твоею обративши, мя спаси.

Песнь 9

Ирмос: На Небесех благословенная / и на земли славословимая, / радуйся, Невѣсто / Невѣстная.

Со пророки, яко пророк, / радостно ныне в Небесных веселишися обителех.

Свѣше ны назираеши ныне, / благоговейно ты славословящая, / Богоглаголивѣ всебогате.

Сокращен путь спасения / Ибилъ покаянием / богомудренно показя.

Богородичен:

Возвеля еси ны, падшия, Мати Божия, / благоутробнаго Владыку и Спаса рождши.

Ин

Ирмос: Бога / человеком не возможно видети, / на Негоже не смеют чини Ангельстии взирати: / Тобою бо, Всечистая, явися человеком / Слово воплощено, / Егоже величающе, / с Небесными вой / Тя ублажаем.

Крепость низложил еси ратоборца, / Божественною яве силою препоясався, страдальче доблий Уаре. / Тем ты хвалим, врачевание обильное от твоих мощей, вернии, почерпающе.

Яко свѣт, яко утро, яко великое солнце / в земныя прострѣся память твои концы, / светоносными просвѣщающе сияньми / твоих честных подвигов вся, прехвальне, / и мрак сердец отгонящи.

С тобою сияюща видевши славою мно́гою /
своего́ сы́на чадолюбивая, всех Бога велича́ше; /
тебе же и́скреннейше, му́чениче, / сла́вяше, вели-
ча́йшаго предста́теля, / я́вственно обогати́вшись.

Земля, на нейже терпели́вейшее тѣло твоѣ,
му́дре, лежи́т, / Божѣственне освяти́ся, / но даждь
моли́твами твоими́ нам разреше́ние грехо́в, / жи-
ти́я исправле́ние, У́аре, / и всех неудобных избав-
ле́ние.

Богородичен:

Явлься, Дево, / из Тебе́ Господь, свѣтлаго
облака, / египетския куми́ры всяческой па́губе
предаде́; / мно́жество же страсотѣрпцев Сего́
носи́ти сподоби, / Сего́ подража́тели честнымъ Его
страда́нием.



**В
ТОЙЖЕ
ДЕНЬ**

**И́на служба, бденная, святому́ мученику У́ару,
ему́же дана бысть благодать умоли́ти
за умершия Клеопáтрины прародители,
не сподобльшиися прияти́ святаго́ Креще́ния**

Служба удалена, см. по́яснение: <https://azbyka.ru/molitvoslov/o-svyatom-muchenike-uare-i-cerkovnoj-molitve-za-npravoslavnyx.html> (О свято́м мучени́ке уаре и́ церко́вной моли́тве за неправославных).

* удавля́ет — умерщвля́ет.

В
ТОЙЖЕ
ДЕНЬ



**Пренесение мощей
преподобнаго Иоáнна Рýльскаго, чудотворца
НА МАЛОЙ ВЕЧЕРНИ.**

На Господи, воззвах: поставим стихов 4 и поем стихиры, глас 8:

Подобен: **О** преславнаго чудесе:

Разума свѣтлостію украшáяся / и заповедьми Божественными / просветів дýшу твою, / о тлѣнных и мимотекущих небрегл еси / и зѣмлю с земными оставил еси, / в пустынях же жити избóлил еси / и Христа пáче всех возлюбил еси, / Иоанне преблаженне, / Егоже моли, да спасѣт дýши наша яко милосерд.

Любѣзне Владыце последовал еси, / от младых ногтей Того совершáя повелѣния, / и благодáтию

пáче, / нéжели млекóм, воспитáн, / возрáсл еси в целомúдрии и чистотé / и, в дом Божий приходя и поучáясь, / Христа обрёл еси, / Иоанне преблаженне, / Егоже моли, да спасет дýши нáша яко милосерд.

Пощéнием и бдéнием / ум свой очíстив, возшёл еси на высотú Небесную / лествицею добродетелей / и, в славе со Ангелы прísно водворяясь, / на врагí Небéсную побéду нам испросí / у Царя́ веко́в, Христа Бога нашего, / Иоанне преблаженне, / Егоже моли, да спасёт дýши нáша яко милосерд.

Веселíся, пусты́не Рыльская, / приёмши в себе светíло мы́сленное, / светолúчными сия́ньми весь мир просвещáющее / и чудесы́ лю́ди ко Христу приводя́щее, / исцелений бо обíльно потóки изливáет / и болéзни вся исцеля́ет. / Но моли́ся Христу Богу, / Иоанне преблаженне, / да спасёт дýши нáша яко милосерд.

Слава, глас 6:

Глása послу́шав Влады́чнн, / преподобне Иоанне, / Спасу глаго́лющу: / иже хóщет вслед Менé идтí, / да отвёржется себе / и, крест свой возьм, да последует Мне; / оставил еси житиé тлénное / и самаго́ себе сраспýл еси, / яко пастырю овчá, Христу последовал еси / и в Едёмскую пáжить, радуясь, вселился еси.

И ныне, Богородичен:

Не ввéри нас человеческому предстáтельству, / Пресвятáя Владычице, / но приими́ моление рабо́в Твоих. / Скорбь бо одержит ны, / терпéти не можем дéмонскаго стреля́нн; / покрóва не ймамы, ниже́ где прибéгнем, окаяннн, / всегда́ побежда́еми, / и утешéния не ймамы, / разве Тебе, Владычице мира, / упováние и предстáтельство вёрных, / не прézри моления нашего, / но полéзно сие́ сотвори.

На стиховне стихиры, глас 2.

Подобен: Доме Евфрафов:

Явíлся еси / от ма́терних пелён / освящён сосúд, / Богонóсе Иоанне, / и дом Пресвятаго Духа.

Стих: Честна́ пред Го́сподем смерть преподо́бных Его.

Лэсти лука́вых бесо́в / посрами́л еси / силою крэ́стною / и уясни́л еси славу Христову, / отче Иоанне.

Стих: Блажен муж, бойся Господа, / в за́поведах Его восхо́щет зело́.

Взят был еси, / якоже Илия, / на колесни́це добродетелей / и прешéл еси неходата́йственне к Троице, / Иоанне всеумдре.

Слава и ныне, Богородичен,
глас и подобен тойже:

Горé Тя ли́цы / Ангельстии, Дево, / поют с до́льными, / славяще непрестáнно / Рождество Твое пречистое.

Тропарь, глас 1:

Покая́ния основáние, прописáние умилéния, / о́браз утешéния, духо́внаго совершéния / равно-ангельное житиé твое бысть, преподобне. / В моли́твах у́бо и в пощéниях и в слезáх пребывáвый, / отче Иоанне, / моли Христа Бога о душа́х нáших.

Слава и ныне, Богородичен:

Гаври́лу вещáвшу Тебе, Дево, радуйся, / со глáсом воплощáшеся всех Влады́ка / в Тебе, свя-тém кивóте, / якоже рече́ праведный Давид; / яви́лася еси шир́шая Небес, / поносíвши Зижди́теля Твоего. / Слава Всельшемуся в Тя, / слава Прoшедшему из Тебе, / слава Свободíвшему нас Рождествóм Твоим!

И о́тпуст.

НА ВЕЛИЦЕЙ ВЕЧЕРНИ

Первыя кафизмы первый антифон: Блажен муж:

На Господи, воззвах: поставим стихов 8

и поем стихиры, глас 1:

Подобен: Небесных чинов:

В по́стницах возсия́вшего прообразовáние, пусты́нное воспитáние / Ры́льского светильника / словесы́ и пэ́снями вси вёрнии да восхва́лим, / зову́ще и глаго́люще: / радуйся, вели́кая сла́во, / я́же в нáша дни яви́ся, / Иоанне преблаженне.

Всю надежду возложив Творцу твоему и Богу, / самаго себе привел еси Владыце, / Иже недра отверз, млеко́м ты воспита́ / ду́шу питающих писаний / и Небеснаго Царствия наследника ты сотвори́, / всеми верными почитаема, / Иоанне преблаженне.

Посреди двою животу́ / разумне Богоугодно мерило поставил еси, отче, / ибо тлеющая оставил еси; / разумев же присно пребывающа Христа Бога, / и Тому правило души твоя / усердно, блаженне Иоанне, прилепил еси.

Радуетися, видев совершение трудов твоих, / ихже бо око не виде, / ни ухо слыша / доброты райския восприял еси, / светлое воздаяние подвигов твоих, / и рака твоя на земли благодать источает, / тело твое нерушимо имущи, / Иоанне преблаженне.

Ины стихиры, глас 4:

Подобен: Свыше званный:

Зарями Духа просветився, / егда ты Божественное желание распали́ / и ду́шу впері́ / Того возжелети любви войстину крепчайше, / тогда преобидел еси плоть и кровь, / и вне мира изшел еси, / многим воздержанием и безмолвием Сему соединяся. / Темже исполнился еси отгуду благих, / якоже просил еси, / и просиял еси, яко звезда, / озаряя души наша, Иоанне.

Бесов лукавых стрелы сокрушил еси благодатию Божественною / и ловления их всем уяснил еси / учёными твоими; / Духа же сияньми облистаем, / монашествующих Богозарен светильник явился еси, / и пустыни Рыльския первое украшение, / и болящих искуснейший безмездный врач, / и добродетельнаго жития / первообразное начертание, Иоанне.

Светодательными зарями исцелений / ты преславно просвещаеши подсолнечную, / недугов отгоняя тьму глубокую; / темже ты солнце другое познаваем, / и иноков утверждение, / и наставника спасаемых Божественным Духом. / И ныне память твою совершаем / светлую и спасительную, / прегрешений разрешение тобою приемлюще, Иоанне.

Слава, глас 6:

**Приидите, православных собори, / духовне
возрадуемся днесь, идеже Богомудрый Иоанн / в
память свою собрал ны есть, к нему вопиющих: /
радуйся, пустынная красото и Ангелов
совсельниче. / Радуйся, Рыльская похвало и бол-
гаром согражданине. / Не престай моляся Христу
Богу / о иже верою и любовью почитающих /
присночестную и всепраздненственную память
твою.**

И ныне, Богородичен, глас 6:

**Кто Тебе не ублажит, Пресвятая Дево? / Кто
ли не воспоет Твоего пречистаго Рождества? /
Безлетно бо от Отца возсиявый Сын
Единородный, / Тойже от Тебе, Чистыя, пройде,
неизреченно воплощся, / естеством Бог сый и
естеством быв человек нас ради, / не во двою
лицу разделяемый, / но во двою естеству неслит-
но познаваемый. / Того моли, Чистая
Всеблаженная, / помилуватися душам нашим.**

**Вход, прокимен дне и паремии три преподобническакия.
Премудрости Соломоновы чтение (главы 5 и 6). Премудро-
сти Соломоновы чтение (глава 3). Премудрости Соломоно-
вы чтение (глава 4) (зри страницы 791—792).**

На литии стихиры самогласны, глас 2:

**Воздержательное обучение на земли собрав, /
преподобне отче Иоанне, / и страстей прилоги
вся угасив течением слез твоих, / лествица Боже-
ственная и честная, на Небо возводящая, / всем
явися Богоприятное житие твое; / благочестия бо
плоды показуя, / исцеляеши немощи страстей
верно тебе вопиющих: / радуйся, востока звездó
светозарная / и монашествующих добрый
пастырю; / радуйся, преславное пустынным ов-
цам крепкое ограждение / и Церкви честное
утверждение; / радуйся, заблудшим великий
наставниче / и вселенней светлое радование.**

**Земнаго Ангела и Небеснаго человека, / миро-
ви благоукрашение, / сладость добродетелей и
наслаждение благих, / постников похвалу, Иоан-
на почтим. / Насажден бо в дому Божии
праведно, / яко кедр в пустыни, / умножи стадо
Христовых овец / в преподобии и правде.**

Глас 4:

Возсия днесь пресвѣтлая пѣмѣть твоѣя, / Богомудре **Иоанне**, / нас созывающе к похвалению Христа Бога нашего. / Темже притекающе к раце мощей твоих / и исцеления дары приемлюще, / Спаса, ты прославльшаго, воспеваем во веки.

Чистый душею и сердцем, / Ангеле земный и человеке Небесный, / дѣвства учителю и воздержания известное мѣрило, / **Иоанне** блаженне, / живый с Владыкою твоим / и немолчное славословие / со Ангелы и преподобными Тому принося, / творящая твою священную пѣмѣть / спасай непрестанными молитвами твоими!

Глас 5:

Преподобне отче **Иоанне**, / ты воистину явился еси постником похвала, / крепость Православия и вселенней свѣтило незаходящее, / льстиваго врага не убоявся / и устрашений его не смутився, / но благодатию Божественною премудренно / попрад еси всю лесьть его, / от неяже и нас избави, молим тя!

Слава, глас 5:

Радуйся, пустынное украшение, / благоухания вселенную исполняющее, / и гору Рыльскую пѣнием оглашающее, / и Церковь Болгарскую венчающее: / Ангелом бо был еси сожигатель, / полков бесовских прогонитель, / ересей же разоритель и всякия лести из корене потребитель. / Темже в Вышнее вселився жилище, / преподобне отче **Иоанне**, / Христу Богу молися / даровати душам нашим мир и велию милость!

И ныне, Богородичен:

Храм и дверь еси, палата и Престол Царев, / Дево Всечестная, / Еюже Избавитель мой, Христос Господь, / во тьме спящим явися, Солнце сый правды, / просветити хотя, / яже созда по образу Своему рукою Своею. / Темже, Всепетая, / яко матери дерзновение к Немю стяжавшая, / непрестанно моли / спастися душам нашим.

На стиховне стихиры, глас 8.

Подобен: **О** преславнаго чудесе:

Преподобне отче **Иоанне**, / ты яже на земли суетная оставив, / Христу Богу твоему усердно

последовал еси, / не предпочёт тлѣнных паче
 пребывающих; / в пустыни же, якоже во граде,
 живый, / демонския полки победил еси. / О, кто
 возмогл бы изрещи / твоея души войстину пламе-
 неющую теплоту / яже ко Господу, приснославне.

Стих: Честна пред Господем / смерть преподоб-
 ных Его.

Преподобне отче Иоанне, / ты войстину явил-
 ся еси / правило избранное монашествующих, / и
 православных услаждение, / и всей вселенныя
 светильник; / врага бо лукаваго не ужасился еси
 страхований, / в пещере живый. / О, дарования
 Духа сущаго в тебе, / имже всякое поправил еси
 демонов коварство, присноблаженне.

Стих: Блажен муж, бояйся Господа, / в запове-
 дех Его восхощет зело.

Преподобне отче Иоанне, / ты войстину ко
 Господу Богу твоему / душу твою крепче вперил
 еси / и пощением чувства очистил еси, / и непре-
 станными твоими молитвами / безсмертныя жи-
 зни сподобился еси. / О, удобрения постников, /
 егоже Христос, радуящаяся, прият преискренне /
 в невестственныя обители, Богомудре!

Слава, глас 4:

Пустынное возлюбив житие / и Ангельское
 восприим служение, / мира возненавидел еси
 леть временную / и явился еси Церкви светило
 пресветлое, / Ангелом сопричастник и пустын-
 ным Божественное украшение, / скорбящим
 радость, / немощным исцеление и всем верным
 спасение. / Но молися Христу Богу, всеблаженне
 Иоанне, / мир вселенней даровати и душам на-
 шим велию милость.

И ныне, Богородичен:

Призри на моление / Твоих раб,
 Всенепорочная, / утоляючи люта на ны
 востания, / всякия скорби нас изменяючи; / Тя бо
 Едину твердое и известное утверждение имама /
 и Твое предстательство стяжахом, / да не посты-
 димся, Владычице, / Тя призываючи. / Потщися
 на умоление Тебе верно вопиющих: / радуйся,

Владычице, всех по́моще, / ра́досте и покрóве, / и спасéние душ наших.

На благословении хлебов тропарь преподобнаго дважды, писан на малой вечерни, и Богородице Дево: единожды.

НА УТРЕНИ

На Бог Господь тропарь преподобнаго дважды и Богородичен единожды.

По первом стихословии седален, глас 4.

Подобен: Вознесыйся на Крест:

Зв́анию Господа твоегó послéдовав, / мир оста́вил еси и вся мира прекра́сная, / преблаженне отче Иоанне; / претерпéл же еси усéрдно озлоблéние пусты́нное / и мýжески отразил еси полкí бесóвския. / Темже прýсно твою память / пéсньми восхваля́ем véрно.

Слава и ныне, Богородичен,
глас и подобен тойже:

Обнови́ла еси, Чíстая, / Божéственным Рожде́ством Твоим / истлéвшее страстьми́ / земнорóдных мёртвенное существó / и возвелá еси вся от смéрти к ж́изни нетлénней. / Темже Тя по дóлгу восхваля́ем вси, / Дево препросла́вленная, / я́коже прорекла́ еси.

По втором стихословии седален, глас 5.

Подобен: Собезначальное Слово:

Пресéльник быв от земли́ отéчества твоегó / и любóвь всю земnúю оста́вив, / на Го́ру возшéл еси / и до Небéс возвы́сился еси стóлп, / челове́ки наставля́яй на путь спасéния. / Темже и всели́лся еси в зéмлю крóтких, / Иоанне, преподобне отче наш.

Слава и ныне, Богородичен,
глас и подобен тойже:

Стра́нное Девы та́инство / мýрови яв́ися спасéние, / из Неяже род́ися Бог без сэмене / и плóтию показáся кромé тлéния: / всех ра́досте, Го́споди, / слава Тебе.

По полиелеи седален, глас 8.

Подобен: Премудрость и Слово:

Па́стырскую х́итрость воспри́йм, / разúмне упáсл еси / ста́до твое́, преподобне, / Христо́ва бо вседúшно вожде́лел еси учéния, / в нёмже просвет́ился еси / и к ре́вности Ангельскаго жит́ия /

всех воздвѣгл еси / единомудренно прославляти
Господа, / Богоносе Иоанне, / моли Христа Бога
грехов оставление даровати / чтущим любовию
святую память твою.

Слава и ныне, Богородичен,
глас и подобен тойже:

Пречистая Дево, Мати Божия, / души моей
страсти лютыя / исцели, молюся, / и прощение
даруй моих прегрешений, / яже безумне содеях, /
душу и тело оскверних, окаянный. / Увы мне, что
сотворю в час он, / внегда Ангели душу мою
разлучат / от страстного моего телесе? / Тогда
Помощница ми буди / и Предстательница
теплейша, / Тя бо имам надежду, раб Твой.

Таже степенна, 1-й антифон, глас 4. Прокимен, глас 4:
Честна пред Господом смерть преподобных Его.

Стих: Что воздам Господеву о всех, яже воздаде ми?
Всякое дыхание: Евангелие от Матфея, зачало 43: Вся Мне
предана суть:

По 50-м псалме стихира самогласна, глас 6:

Воссия днесь пресветлое торжество / честныя
памяти твоея, Богомудре отче Иоанне, / иже от
младенства Богу прилепился / и Того стопам
последовав, / мирский мятэж, аки нуждное волне-
ние, преплыл еси / и в Царство Небесное достигл
еси. / Темже поклоняющися мощем твоим, / верно
Христа славословим, давшаго ты нам тепла о нас
молитвенника, / чтущих любовию честную память
твою.

Канон преподобному, глас 8, егоже краегранесие:
Радуйся Иоанне, светильниче пресветлый.

Песнь 1

Ирмос: Воду прошед, яко сушу, / и египетскаго зла
избѣжав, / израильтянин вопияше: / Избавителю и Богу
нашему поим.

Разумный свет мудрости воссияй ми ныне, /
молюся ти, преподобне отче, / пети начинающу
ми твое честное житие, / и Божественныя благо-
дати исполни уста моя.

Ангелу подобяся воистину, удалился еси всех
яже в мире / и, бежав телом и душею, водворился
еси в пустыни, / якоже Моисей Боговидения,
богато наслаждаяся.

Довольно источника пив Евангельскаго вод обильных, / из чрева ныне реки чудес источаеши, преподобне Иоанне, / и напаяеши верою к тебе притекающия.

Богородичен:

Утробу Твою обитá Бог Слово, Дево Чистая, / якоже капля сошед, каплющая на землю / и естество человеческое, пламенем злобы горевшее, / обновí орошением.

Песнь 3

Ирмос: Ты еси утверждение / притекающих к Тебе, Господи, / Ты еси свет омраченных / и поёт Тя дух мой.

Исполнь Духа и ум на Небо простёр, / о тленней пищи не попеклся еси, / но хлебом Ангельским питался еси.

Струями слез твоих землю пустынную напоил еси / и плод приносíti тебе сланутка * неоранно утучнил еси.

Яко птенец, к Богу возлетети желая, преподобне отче, / гнездо себе в древе сотворил еси, / от земных облегчився.

Богородичен:

Иисуса, Сына Твоего, / милостива мне сотвори, злое творящему, Пречистая, / во еже не видети ми Того лице отвращающа.

Седален, глас 6.

Подобен: Милосердия двери:

Пóстническая пóдвиги понесл еси / и страдальческим венцем увязался еси: / с безплотными бо враги в телеси борясь / и воинства их низлагая, / удивил еси терпением твоим Ангелы, / ихже житию во плоти поревновал еси. / Но молился Христу Богу, отче Иоанне, / спастися нам.

Слава и ныне, Богородичен:

Милосердия двéри отвéрзи нам, / Благословенная Богородице, / надеющиеся на Тя да не погйбнем, / но да избавимся Тобою от бед, / Ты бо еси спасение / рóда христианскаго.

Песнь 4

Ирмос: Услышах, Господи, смотрения Твоего таинство, / разумех дела Твоя / и прославих Твое Божество.

* сланутка — сладкий струец, турецкий боб.

Обрёл еси Бога утверждённа на версе Божественныя лэствицы добродетелей, / ёюже возшэд, почыл еси от трудов и болéзней.

А гня тя дóбраго Пáстыря, / в горé крýющеся, преподобне отче, явйша овчáта, / от своей ограды убежáвшая.

На тя нашédшии пáстырие / всем проповéдаша странное терпéние твое / и Богу в в́шних слáву возсылáху.

Богородичен:

Неневéстная Мáти, / тобою увéдана б́ша шéствия Бога нáшего, / от Твоих пречйстных кровей приёмшаго человекéство.

Песнь 5

Ирмос: Утренююще, вопиём Ти, / Господи, спаси ны, / Ты бо еси Бог наш, / рáзве Тебе инóго не вéмы.

Елицы Боголюбйвии, преподобне отче, / глагóлов послушающе пáстырских, / на видéние твое в пустыню прихождáху.

Слáва твоя далéче сýщия к тебе созывáше, / якоже глас в пустыни вопиющаго всюду проносáщийся.

В дрéве уединйвся, якоже птйца, преблаженне отче, / оправдáния Божия дéлая, не почивáл еси, / ниже Гóсподеви моляся.

Богородичен:

Единаго в Тебе, якоже в главйзне книжней написаннаго, / Бóга поносйвши, Чйстая, / в праведных мя Кнйзе напиши.

Песнь 6

Ирмос: О чйсти мя, Спáсе, / мнóга бо беззакония моя, / и из глубины зол возведй, молюся, / к Тебе бо возопйх, и услыши мя, / Бóже спасéния моего.

Твориши делá Фесвйтянина Илий, преподобне отче: / мáлым бо хлéбом мнóгих питаéши / и в сытость чýдом кормйши.

Извóлиша мнóзи с тобою жйти, блажéнне, / мйра сего преобйдевше слáдость / и твоему началообразному поревновáвше житйю.

Лечéбную силу от Бóга прийм, / слепым свет даéши, глухим слышание, хромым хождéние / и всем véрою приходящим здравие.

**На главѹ твою миро снѣде и на брадѹ твою
масло радости, / еже свещѹ сѣрдца твоего неуга-
симо соблюде, преподобне.**

Богородичен:

**Избранная Агнице Чистая, / Льва страшнаго
рождшая, и Агнец бывшаго, / и на заклѣние
безгласна приведеннаго, / и беззакония моя на Ся
восприимшаго.**

Кондак, глас 8.

Подобен: Взбранной Воеводе:

**Ангельскому житію поревновав, преподобне, /
вся земная оставив, ко Христу притекл еси / и,
Того заповедьми ограждаяся, / явился еси столп
непоколебим от вражиих нападений. / Тем зовем
ти: / радуйся, отче Иоанне, светило пресветлое.**

Икос:

**В словесех и делех на земли возсиявшаго и
Спасово учение совершивша, / земнаго Ангела и
Небеснаго человека, Иоанна славнаго, / сошед-
шеся, похвалим, вси вернии, сиче поюще и к
нему глаголюще: / радуйся, Средечское
прозябение; / радуйся, пустынное воспитание. /
Радуйся, от юности Бога возлюбивый; / радуйся,
вся всего мира ни во чтоже вменивый! / Радуйся,
иже высокое житие постническими труды
показавый; / радуйся, злокозненнаго змия копием
терпения твоего низложивый! / Радуйся, на го-
рах, яко солнце, возсиявый; / радуйся, горы и
холмы благоухания исполнивый! / Радуйся, гра-
ды и веси просветивый чудесы; / радуйся, вся
страны озаривый добродетельми! / Радуйся, ста-
ду твоему твердое ограждение; / радуйся, благо-
честивым победное венчание! / Радуйся, отче
Иоанне, светило пресветлое!**

Песнь 7

**Ирмос: От Иудеи дошедше, отроцы / в Вавилоне
иногда / верою Троицкою пламень пещный попраша,
поюще: / отцев Боже, благословен еси.**

**Честную церковь воздвигл еси, якоже ограду
овцам, / себе церковь живу сотворив, Господеву
пой: / отцев Боже, благословен еси.**

**Еже миру распятие претерпев и яже на земли
уды умертвив, / некому ты жил еси, но Христос**

в тебѣ, Емуже взывал еси: / отцев Божѣ, благословен еси.

Правило души твоея разрушити не возмогаша / ни полове ниже болѣзни, ни телесное измождѣние, ни старость претружденная, / но Владыки твоего желая, неустанно взывал еси: / отцев Божѣ, благословен еси.

Богородичен:

Руно орошенное, Дево, пламень грехов моих угаси, / купино неопалимая, страстей моих терние попали, / подаючи ми на воде жити упокоения и геенскаго мя огня свободяючи.

Песнь 8

Ирмос: Седмерицею пещь / халдейский мучитель / Богочестивым неистовно разжже, / силою же лучшею спасены, сий видев, / Творцу и Избавителю вопияше: / отроцы, благословите, / священницы, воспойте, / людие, возносите во вся веки.

Егда, солнце пресветлое, на западе жизни земныя себе уразумел еси, / ученики наказав и во страхе Божии утвердив, возвестил еси болѣзней твоих возмездие и, радуясь, дух твой Господеву предал еси.

Смерть не лишит телесе твоего живущия в тебѣ благодати Божественныя, / но, прешедшим днем четыредесатым, сам являешься, и в землю погребсти ты повелеваеши, / и чудес струи источаеши.

Видяще пучину чудес твоих, храм твой сокровище проразумеваем многоценное: / вси бо, недугом одержими, в той притекающе, скоро от гроба твоего здравие приемлют, / ты, прославльшаго Бога, славяще.

Богородичен:

Еще светлее света солнечнаго / проразумеваем дѣвства Твоего светлое сияние, Пречистая: / Света бо безлѣтнаго и солнцу Творца во чреве Твоем имела еси, / из Тебѣ возсиявшаго и тьму прелести разгнавшаго, / и весь мир светом Богоразумия просветившаго.

Песнь 9

Ирмос: Ужасеся о сем Небо / и земли удившася концы, / яко Бог явися человеком плотски, / и чрево Твое бысть пространнейшее Небес. / Тем Тя, Богородицу, / Ангелов и человек чиновачалия величают.

Тѣло твоѣ честнѣе во грѣбѣ положѣнное / разрѣшшуся соузу естѣственному и тебѣ Бѣгу дух предавшу / облагоухаетъ вся приходѣщая и Бѣга прославляетъ чудесы, Иоанне преблаженне.

Лику монашествующих и множеству верных теплый обретаешься заступник, / иже злобу разрушая и прошения исполняя. / Бог бо возвеличи тя, приснаго раба Своего, человеки и скоты тобою исцеляя.

Исполни сердца моего желание, чудес источник: / даруй ми благодать твою, от всякаго искушения мя избавляя, / на Суде же грядущем во Едемстей мя всели пажити молитвами твоими, / от горяща сердца тебе песнь принесшаго.

Богородичен:

Изрядно предпочистившись во святая святых вселением и Ангельскою рукою питанием, / человеком Бога породила еси, от Твоих Пречистых кровей плоть приемшаго / и якоже прежде рожества Деву Тя соблюдшаго.

Светилен, глас 2.

Подобен: Жены услышите:

Радуйся, пустыне Рыльская. / Веселися, иноков сословие. / Приидите, вси вернии, / раку обступивше преподобнаго, / токи проливающую исцелений, / песненными похвалами / воззовем к нему, глаголюще: / радуйся, Средечское прозябение / и пустыни доброе воспитание.

Слава и ныне, Богородичен:

Непроходимую дверь единую, / плодовитую маслину, / кадельницу всезлатую, Божественный Огонь носящую, / стамну Небесных Манн / и светоносный облак, / Богородицу святую вси прославим.

На хвалитех стихиры, глас 4.

Подобен: Званный свыше:

Милости ради многия / и безмернаго благоутробия / род человеческий спасти восхотевшаго / глаголы послушал еси, всеблаженне, / и о суетных небрегл еси, / но вскоре землю оставил еси отечества твоего, / и сродник сожительство / и временное

наслаждѣние, / и стопамъ послѣдовалъ еси Христа
Бога нашего, / Егѡже моли спасти / и просветити
души наша.

Ничтоже возможе ты разлучити / отъ любве
Христовы, всеблаженне: / ни мирское
украшение, / ни отеческое стяжание, / ни ближ-
нихъ пристрастие, / ни суетная слава, / но сия вся
ни во что же вменивъ, / якоже елень, распалился
еси жажду / и потѣклъ еси на источникъ воды
живыя Христа Бога нашего, / Егѡже моли спасти /
и просветити души наша.

Избра ты Господь во святыхъ изрядна, / и в
постницехъ преподобна, / и в рабѣхъ верныхъ талантъ
возрастивша, / темже ныне духъ твой веселится / в
радости Господа твоего, / честное же тело твое
намъ предлежитъ, / воню благоухания
испускающее / и цельбы подающее благодатию
Христа Бога нашего, / Егѡже моли спасти / и
просветити души наша.

Разумной души покорилъ еси / страсти телес-
ныя воздержаниемъ / и, безстрастия крылы
украшенъ, / благодать приялъ еси / человекъ немощи
целити / и духовъ лукавствия прогоняти. /
Темже лица блажаще ты иночествующихъ / и
верныхъ соборы, твою память празднующе, / вос-
певаемъ прославльшаго ты Христа, Бога нашего, /
Егѡже моли спасти / и просветити души наша.

Слава, глас 8:

Христово избранное стадо, / приидите, стецемъ
къ честней памяти / преблаженнаго Иоанна, / в
Рыльстей пустыни просиявшаго. / Се предлежитъ
намъ честное его тело, / веры нашей
утверждение, / преподобныхъ удобрение, / еретич-
ествующихъ посрамление, не верующихъ
воскресению: / сей бо по смерти слепымъ подаётъ
прозрение, / хромымъ хождение, сляченныя
исправляетъ, / ослабленныя стяжаетъ, / бесы про-
гоняетъ и благоверныхъ на сопротивныя
укрепляетъ. / Духомъ же предстоитъ Престолу
Владычню, / молится всегда ко Господу / о ѡже
верую и любовью / празднующихъ всечестную па-
мять его.

И ныне, Богородичен:

**Владычице, прими моли́твы ра́б Твои́х / и
изба́ви нас / от вся́кия ну́жды и печа́ли.**

Славосло́вие вели́кое и о́тпуст. И быва́ет помáзание бра́тии
еле́ем от ла́мпады преподо́бнаго.

На Литургии: Блаже́нны от канона преподо́бнаго песни 3-я
и 6-я. Прокимен глас 7: **Честна́ пред Го́сподем смерть
преподо́бных Его́. Стих: Что возда́м Го́сподеви о всех,
яже воздаде́ ми? Апостол к Галатам, за́чало 213: Плод
духовный е́сть: Аллилу́ия, глас 6: Блаже́н муж, боя́йся
Го́спода, в запове́дех Его́ восхо́щет зело. Стих: Сильно на
земли́ будет семя́ его. Евангелие от Луки, за́чало 14.
Прича́стен: **В па́мь вечную́ будет праведник:****



**В
ТОЙЖЕ
ДЕНЬ**

Святаго благовернаго царевича Димитрия Угличскаго

НА МАЛОЙ ВЕЧЕРНИ

На Господи, воззвах: стихиры, глас 1.

Подобен: Прехвальнии:

**Завистию богомёрзскою неправеднаго власто-
любителя убиен бысть, Богомудре, / тебе бо невед-
ущу лукаваго его умы́шления, / но яко незлббив
младенец сам себе на заколение приведе, / благо-
приятными жертвы Бо́гови обретеса.**

**Не воспротивися, благородне, неправедному
властолю́бцу и губителю, / но отступáше ему
земнаго царствия маловре́мянную славу, / едина-
го же Небеснаго Царствия взыскал еси, егоже и
наследова, / тем Христу о нас моли́ся, страстоте́р-
пче Димитрие.**

**Лукавый раб и льстец Борис тцашеся погуби-
ти тебе / чародейственным волховáнием и убий-
ством неправедным, / но сам убо вскоре увязе́ в
сети своей от Бога, / и разруши́ся его неправед-
ное царство. / Ты же, благоверный, со Христом
царствуеши во веки.**

Слава, глас 6:

**Возсия днесь па́мь твоя, Богоприятне, / в
нейже Богодарова́нными ти чудеса / ду́ши и
телеса просвещáеши верных, / любезно и радо-**

стно припадающих к ти./ Темже хвалами псаломски вопием, рекуще:/ радуйся, святая отрасль Боголюбивая,/ породившаяся от благочестиваго корене,/ радуйся, порожденное святым Крещением,/ помазанное Духом Святым,/ радуйся незлобивый агнече,/ неправедно закланный от врага вкупе и злаго раба./ И сего ради точиши/ Богодарованныя ти чудеса неисчетныя приходящим ти с верою./ Темже, благоверный царевичу Димитрие,/ не престай моляся Христу Богу/ сохранить отечество твое, град и люди от враг ненаветны.

И ныне, Богородичен. На стиховне стихиры, глас 2.

Подобен: Д оме Евфрафов:

Яко воистинну/ благочестиваго корене святая отрасль/ от младенства Богом избранная,/ Егоже и возлюбив,/ неправедное заколение претерпел еси.

Стих: Радуйтесь, праведнии, о Господе,/ правым подобает похвала.

Днесь радуется Церковь Божия/ в нейже реки чудес/ многоцелébныя ти мощи/ источают верным благолепие,/ Димитрие Боголюбэзне.

Стих: Насаждени в дому Господни/ во дворех Бога нашего процветут.

Земное царство оставль,/ в Небесное Царство кротостию и незлобием,/ яко на колесницу, возшел еси,/ своею кровию, яко багряницею царскою, одеян./ Тем проси нам у Христа мира и велия милости.

Слава, глас 2:

Приидите, вси русстии народи,/ христоименитое стадо Богословэсное,/ благовернии князи со святители и всеосвященный Соборе со всем народным множеством,/ воспоем Христа Спаса прославляющаго святых Своих,/ якоже и сего солнцесвэтлаго и благороднаго царевича Димитрия,/ от младых ногтей крепкодушнаго покоя вооружника,/ поборника благоверию,/ заступника и помощника отечеству своему,/ иже святым его именем дерзнувшаго нареци себе розстрига Гришка еретик,/ и царство, аки волк,

восхитѣвша, / злопрелѣстника и врага Церкви Божия силою Божиею победѣвшаго / пришествия ради святыхъ мощей своихъ во градъ Москву. / Егоже в помощь призвѣвше, непрестанно вопием: / о, первомученикомъ сострадальче, благовѣрный царевичу Димѣтрие, / моли Христа Бога такового безчества избавити / и спастися душамъ нашимъ.

Тропарь, глас 2:

Яко благочестиваго корене Боголюбѣвый произыде плод, / яко агня незлобиво, неповинно во младенствѣ заклан бысть / от властолюбца вкупе и злаго раба. / Тем, яко златѣми крылы, / душевною чистотою и младенческимъ незлобиемъ / к Небесней высотѣ возлетел еси, страсотѣрпче Димѣтрие. / И ныне кровь твоя от земли тайно вопиѣт к Богу, / яко Авеля праведнаго. / Сего ради покланяемся верою ти, / славяще прославльшаго тя Бога, / Егоже моли стране нашей Богоугодне быти / и сыновомъ русскимъ спастися.

Слава, ин тропарь, глас 1:

Всеоружествомъ Духа благодати вооружѣн быв / и неборим столп и утверждение отечеству своему показася, / яко агнецъ незлобивый, от врага неправедно заклан быв / и в жертву непорочну Господеву принесѣся. / И ныне дар благодати от всехъ Подвигоположника прием, / источаещи всемъ исцеление, достохвальне благоверный царевичу княже Димѣтрие. / Слава Воспримшему тя отъ земныхъ в Небесная, / слава Венчавшему ты венцемъ неувядаемымъ, / слава Действующему тобою всемъ исцеление.

И ныне, Богородичен.

НА ВЕЛИЦЕЙ ВЕЧЕРНИ

На Господи, возвах: стихиры, глас 5.

Подобен: Радуйся:

Радуйся, Церковь Божия дивная вправду, / приемшая сокровище безценное, / многочудѣсныя мощи благородныя, / от нихже реки чудесъ проливаются, / к нимже прибегая / и всякъ с верою, не погрешитъ своего упования, / но вскоре получитъ егоже, аще проситъ, / к немуже верно вопием: / достохвальный великий царевичу

Димитрие, / Христу молися даровати душам нашим мир и велию милость.

Радуйся и веселися великохрабрый победоносче Димитрие, / Боголюбивая твоя душа / не прелести тлеющего мира красоту, ни земнаго царства возделё, / но Единому Богу от младенства душею прилепися / и, Того взыскуя, / кровь свою, яко воду, неповинно пролиал еси. / Тем ныне со Ангелы ликовствуёши, Христу молися / даровати душам нашим мир и велию милость.

Радуйся, предивный граде присноцветущий Москва, / приобретый паки чудотворныя мощи, / иже внутрь тебе порождёнии бысть, / от нихже течет источник исцелений неоскудеемых, / имиже исчезает бесовское множество, / и многолётнии недужи и страсти исцеляются, / и прогонимы бывают нечестивых шатания / пособием благовернаго царевича Димитрия, / тем, благоверный, Христу помолися / даровати душам нашим мир и велию милость.

Слава, глас 8:

Приидите, новопросвещеннии людие, / давидски Божественными песньми новаго страстотёрпца восхвалим, / той бо от младенства в осмолётном возрасте, яко агня незлобиво, неправедное приим закование / от неправеднаго властолюбца и злаго раба, / мужеумным смыслом и благонадежным упованием непорочну жертву предложи себе Богу, / и онаго убо злаго господоубийцу суд Божий постижёт, / и неправедно его царство разрушится, / и от злаго прелестника врага Божия побежден быв. / Мы же, вернии, возопием: / о страстотёрпче великий царевичу Димитрие, / Христу молися стране нашей на враги одоление даровати / и душам нашим спасение и велию милость.

И ныне, Богородичен, глас тойже.

Паремии мученической (зри страницы 715—716; 791—792).

На литии стихиры, глас 8:

Паче плотскаго благородия духовное яко Божие получил еси, / Христу Богу от младенства душею прилепися, / всяко наслаждение мирское яко не суще оставль, / достигл еси на Небесех

первородных множество, / идеже с ними Троице,
 всех Богу предстоиши, со Ангелы веселяся, / от
 Негоже нетленными венцы венчася яко страсто-
 терпец непобедим, / Егоже моли о нас Единого
 Человеколюбца.

Якоже Давид похваляя вопиет: / из уст младе-
 нец совершил еси хвалу, / ты же, благородне
 Димитрие, сему словеси исполнитель быв / своим
 Боголюбным чистым житием, неповинною
 кровию. / Тем силою Святаго Духа свершил еси к
 Богу свое течение / неповинным своим
 кровопролитием, / иже нещадно заклан бысть,
 яко а́гня незлобив, / и ныне вопиет кровь твоя к
 Богу, яко А́веля праведнаго, / тем Христу молися
 помиловатися душам нашим.

Дивны чудеса Твоя, Господи, дивны вправду /
 и ни единоеже слово довольно к похвалению
 чудес Твоих, / яко удивляеши святых Своя, / како
 кости на́ги источают исцеления, / якоже и сего
 ново́явленнаго чудотворца Димитрия / одарил
 еси цело тело его во гробе лежаще, яко живо, /
 чудеса творит неисчѣтныя всем его чтущим, /
 неоскудно многоразличная подает исцеления, /
 славу и благодарение возсылающим / Единому
 чудодѣйствующему Богу, / прославляющему свя-
 тых Своя.

Слава, глас 6:

Яко многоценное мѣро, / Христу Богу кровь
 свою принесл еси, / от Негоже мзду твоего стра-
 дания прият венец нетленный, / действием Свята-
 го Духа чудодѣеши, / неисчетная чудеса, прихо-
 дящим с верою к тебе / и сего ради вопиѣм: /
 победоносче благоверный царевичу Димитрие, /
 моли непрестанно Христа / отечество твое во
 благодѣнствии устроить и врагом одолительно / и
 спасти души наша.

И ныне, Богородичен.

На стиховнах стихиры, глас 8.

Подобен: Что вас наречем:

Что ты наречем, Димитрие благородне, / вы-
 шних желая дѣльня презрел еси, / и конец
 жития осмолѣтным возрастом мученически
 совершив, / венцем царским от Бога венчался

еси/ яко сын царев и мученик непобедим,/ и вместо земных и тленных на Небеси нетленная восприял еси,/ моли спастися душам нашим.

Стих: Праведник, яко финикс, процветет,/ и яко кедр, иже в Ливане, умножится.

Что ты наречем, прехвальне,/ звезду, сияеши бо чудесы,/ реку ли источаеши бо недугом исцеления,/ всем человеком даруеши здравие и чудес дарование,/ и к Богу о всех ходатай,/ моли спастися душам нашим.

Стих: Насаждени в дому Господни/ во дворех Бога нашего процветут.

Что ты именуем, страстотерпче,/ родителя земнаго оставил еси,/ и Небеснаго Бога Отца получил еси,/ Вышний Иерусалим, мать всех, возлюбил еси,/ идеже со Христом ныне царствуеши,/ великое твое страдание, а большая дарования,/ моли спастися душам нашим.

Слава, глас 6:

Радуйся и веселися, преименитый граде присноцветущий Москва,/ израстивый таковаго благороднаго страстотерпца,/ произшедшаго из царских чресл,/ от сосцу матере младенческим незлобием/ и мужеумным смышлением от Бога,/ от души возлюбившаго Божественныя пении,/ и к Церкви Божии тщанием Боголюбивую душу свою просветив,/ милостынями и нищелюбием светло украшен,/ егоже Богоугодному житию позавидев диавол,/ воздвиже на него уготованнаго себе сосуда,/ злаго властолюбца и губителя Бориса,/ он же научением диаволим/ закла тебе благороднаго, яко агня незлобиво./ Но сий убо, неповинно закланным, на Небесех царствует,/ а заклавый его во веки мучится в геенне огненной,/ но убо, Боголюбивый победоносче,/ Христу молися помиловати люди/ и спасти души наша.

И ныне, Богородичен.

Тропарь, глас 2:

Велика обрете тебе целebника в последнем роде,/ люди твои, русии народи,/ новый страстотерпче Христов, благоверный царевичу княже Димитрие,/ возсия бо на земли чудесы своими, яко звезда небосветлая,/ но, созрелый убо

клас Христу, испив чашу, / яко агнец непорочен,
 заклан бысть в жертву чисту, / принесе себе
 Владыце всех, / от Негоже победным венцем
 увязёся, / просия мирови, яко солнце, / прелести
 вся угасил еси / и Соборную обогащаеши Цер-
 ковь чудотворении, / стране нашей на враги
 поборник, / одержимым же различными недуги
 врач, / всех нас освящаеши богатными дарованиями,
 всехвальне, / и молитвами, святе, твоими всем
 даеши Божественное исцеление.

Слава, ин тропарь, глас 4:

Царскою диадемою одеян, Богомудре
 мучениче, / за скипетр крест в руку приим, /
 явися яко победоносец / и всесожжения жертву
 священну себе принесл еси, Димитрие, / показася
 изряден врач русской стране, / образ в себе
 чудотворения нося, / яко агнец непорочен, от
 раба заколение прият, / убивающаго тело, души
 же коснуться не могуща. / Да плачется убо злый
 властолюбец, / ты же, радуяся, предстоиши Свя-
 тей Троице, / молися стране нашей Богоугодне
 быти / и сыновом русским спастися.

И ныне, Богородичен по гласу.

НА УТРЕНИ

На Бог Господь: тропарь святому дважды.

Слава, и ныне, Богородичен.

По 1-й кафизме седален, глас 1:

От чресл царских произшед, цвет чистоты
 произникнут, / плод благоверия возрастё осмо-
 лётным возрастом / жилище бысть Пресвятому
 Духу, / Божественными чудесы сияя, благородне
 Димитрие, / мир мирови испроси и душам нашим
 велию милость.

Слава, и ныне, Богородичен:

Упование христиан, Пресвятая Дево, / Егоже
 родила еси Бога паче ума же и слова, / непре-
 станно моли с Вышними Силами и со благовер-
 ным Димитрием / дати оставление грехов наших
 всех и исправление жития / верою и любовью
 приснославящим Тя.

По 2-й кафизме седален, глас 4:

Кровь свою, якоже алава́стр мира, Христу принесл еси, / благоверный царевичу Димитрие, / тем и Великий Препоблагий Дародатель прослави́тя и возвыси чудеса Своими благодатными, / и сего ради память твою радостно почитаем, досто-чудне.

Слава, и ныне, Богородичен:

Дево Всенепорочная, якоже Пресу́щнаго Бога рождшая, / с новойвленным чудотворцем Димитрием Того непрестанно моли / оставление прегрешений и исправление жития дати нам прежде конца, / верою и любовью поющим Тя по долгу, Едина Всепетая.

По полиелее, седален, глас 8:

От младенства душою к Богу прилепился / и сего ради венцем мучения от Него венча́ся яко предобр страдалец всечестен, / тем с мученическими лики веселя́ся и Небесныя дары приемлещи, / имиже подаеши от всяких неду́г здравие приходящим к тебе с верою и любовью, / чтущим святу́ю и многоцелебну́ю память твою.

Слава, и ныне, Богородичен:

Яко Деву и Едину в женах Тя без семене рождшую Бога плотию, вси ублажаем роди человечести, / ибо Огнь Божества вселися в Тя, яко Младенца дои́ши и Зиждителя, и Господа, / темже Ангельский и человеческий род, достойно славим пресвятое Рождество Твое и согласно вопием Ти: / моли Христа Бога согрешений оставление даровати воспевающим достойно славу Твою.

Степенна, 1 антифон, глас 4. Прокимен: Возвеселится праведник о Господе / и упоает на Него. Стих: Насаждени в дому Господни / во дворех Бога нашего процветут. Всякое дыхание: Евангелие от Луки, зачало 63 (12, 2—12).

По 50-м псалме стихира, глас 8. Самогласен:

Из младенства изгнан бысть земнаго царства, / но Небесному Царствию от Бога сподобися, / и ныне благодатный дар от Подвигоположника Христа совершенно восприим, / неоскудно исто-

чаеши всем исцеления,/ и сего ради заклан бысть, яко агня,/ не сотворив зла никоегоже, ни супротивися супостату своему,/ но, яко птенец, последуя закланию его,/ и ныне, со Ангелы ликовствуя, Христу, Димитрие, молися,/ яко да милостив будет нам в день Страшнаго Его Пришествия.

Канон святому Димитрию, глас 8.

Песнь 1

Ирмос: Воду прошед, яко сушу,/ и египетскаго зла избежав,/ израильтянин вопиаше:/ Избавителю и Богу нашему поим.

Многомилостивыя Твоя, Христе, помощи прошу,/ страстотерпца Твоего Димитрия молитвами/ отвързи ми устне и просвети разум,/ да воспую светоносную его память чéстно.

Поём Христа Бога нашего, прославльшаго благороднаго Своего угодника,/ Емуже, Димитрие, молися/ помиловати нас, рабы твоя.

Заклан бысть в изгнании, идеже и венец прият от Бога,/ но паки возвратил еси многоцелебныя ти мощи в природное твое отечество,/ идеже струй исцелений неоскудно источаеши нам.

Богородичен:

Заступнице христианом, Помощнице скорбящим,/ Богородице Препетая, спаси Тебе почитающих.

Песнь 3

Ирмос: Н есть свят, яко Господь,/ и несть праведен, яко Бог наш,/ Егоже поет вся тварь:/ несть праведен, паче Тебе, Господи.

От младых ногтей житие стяжа непорочно, добре преочи́стив свою душу,/ на высоту востече отроческих добродейний,/ тем, благородне, со Христом царствуеши во веки.

От враждебнаго раба и безчеловечнаго проли́ял еси кровь свою неповинно, благоверный Димитрие,/ и сего ради вселися в вечная блага,/ яже уготована Бог любящим Его.

Кровь свою, яко алава́стр мира, принесе Тебе угодник Твой Димитрий,/ егоже молитвами, Христе,/ возвыси рог христианский и стране нашей победы на враги даруй.

Богородичен:

Тебе вси ѿмамы прибежище, стену и помощь христиане, / и Тебе славим немолчно, Безневестная.

Кондак, глас 8:

Возсия днесь благоцветущая отрасль благочестиваго корене, / от благоверных Российския страны доброрасленный грозд израстé / и Христови красен плод прозябé. / Темже от земли Воззвáвый тя к вечным обителем, / соблюдает и по убиении твоём невредимо тело твое, / страдальчески обагрено кровию; / благородне святе Димитрие, / соблюдай отечество свое и град твой невредим, / тому бо еси утверждение.

Седален, глас 8:

Вседушно измлада Христа возлюбив, Того премудростию наставляем, / уступил еси земное царство заклавшему тя неправедно властолюбцу и губителю, / и сего ради ныне на лоне Авраáмле почиваеши, со Ангелы веселяся, Димíтрие благородне, / моли Христа Бога грехом оставление даровати, чтущим любовию святую память твою.

Слава, и ныне, Богородичен:

Безвестная Чистая Дево Богородице, Едина верным Предстáтельница и покрове, / бед, и скорбей, и лютых обстояний всех нас избави, / иже на Тя надежду имущих, / и спаси души наша Божественными Своими молитвами.

Песнь 4

Ирмос: Услышах, Господи, / смотре́ния Твоего таинство, / разумех дела Твоя / и прославих Твое Божество.

Во цвете ю́ноством, во младенческом незлобии мира красоту́ оставил еси, / проли́я кровь свою неповинно, / и ныне Небесных благ наслаждаешься с первородными множества, Димитрие.

Всеми́сленно последуя сродником своим, / Роману и Давиду, самобратным по плоти, / неправедно заклан бысть, якоже и она, / с ними же молися благостроину быти отечеству твоему.

**Завистию властолюбною разжен бысть раб,
убийца твой, / закалаёт тя, яко агня незлобиво, /
сам же праведнаго возмездия не убежа́.**

Богородичен:

**Вышшу Тя всех и святейшу Небесных чинов
прославляем / и велегласно вопием: / о Мати Бо-
жия, певцы Своя сохрани и поганых нашествия
разруши.**

Песнь 5

**Ирмос: Господи Боже наш, мир даждь нам, / Господи
Боже наш, стяжи ны, / Господи, разве Тебе иного не вемы, /
Имя Твое именуем.**

**Господь и Бог наш услыша воздыхание твое и
слезы, / прият кровь твою, якоже Авеля
праведнаго, / сего ради с ним безконечно цар-
ствуеши.**

**Тезоименитно миротóчцу, Димитрие, от Бога
стяжа́ именовáние, / с ним же молися покорити
под нозе стране нашей варварская стремления.**

**Яко крин, мученическою светлостию процвел
еси, / действием Пресвятаго Духа благовонную
благодать изцелений источаеши верным / от
цельбоноснаго ти гроба.**

Богородичен:

**Укрепи, Владычице, присносла́влящих Тя, на
супротивныя враги, / яко праведнаго царя Дави-
да на Голиафа, / да Тебе славяще воспеваем: /
радуйся, покрове и Заступнице христианом.**

Песнь 6

**Ирмос: О чисти мя, Спа́се, / многа бо беззакония моя, / и
из глубины зол возведи, молюся: / к Тебе бо возопих и
услыша мя, / Боже спасения моего.**

**Всеоружством духа благодати вооружён быв, /
и непобедим заступник отечеству своему пока-
зался еси, / егоже, благоверне, сохраняй от враг
ненаветно.**

**В непорочну жертву принесё себе, / в непра-
ведно вда себе заколѣние, яко агня незлобиво, / и
сего ради со Ангелы ликуеши, Небесных благ
наслаждаяся.**

**И же светлый твой праздник совершающих,
Богомудре, / моли град твой неборим**

сохранити, / и отечеству на враги одоление даровати.

Богородичен:

Душевныя ми страсти, Богородице, исцели, / Иже безстрастия бывши источник и просветивши лики благоверных Рождеством Своим.

Кондак, глас 8:

Светило явися пресветлое днесь Божественная память твоя, / Богодарованная ти чудеса от всяких многоразличных недугов подают исцеления / с верою призывающим тя, / созываючи нас к похвалению прославльшаго тя Бога, / Егоже моли, страстотерпче благоверный Димитрие, / мир мирови даровати / и от видимых враг люди невредны сохранити, да зовем ти: / радуйся, ты бо еси утверждение граду нашему.

Икос:

Славу земную, яко истлёющую оставль, нетленную на Небесех наследовал еси, / чистый бо сосуд Святому Духу от младых ногтей быв, / и заклан бысть, яко непорочное агня, / отнюду же Мздовоздатель Бог, видев кротость твою, незлобие, даром чудес обогати тя, / тем ныне пребываеши со Ангельскими лики и с перворобдными множества в неизглаголанней радости, Богомудре Димитрие страстотерпче, / моли непрестанно без вреда сохранити отечество твое и люди твоя, да зовем ти: / радуйся, ты бо еси утверждение граду нашему.

Песнь 7

Ирмос: Божия снизхождения / огонь устыдеса в Вавилоне иногда, / сего ради отроцы в пещи радованною ногою, / яко во цветнице, ликующе, пояху: / благословен еси, Боже отец наших.

Ни земнаго царства благородием, ни материя разлучения яко младенец не внимаше, / но мужеумным смыслом вся сия предал еси в руке Богови, / сам же на заколение вдаде себе, вопиаше: / отец наших Боже, благословен еси.

Всенародный глас ти приносим и мольбу, к тебе припадающе, благоверный Димитрие, / просим мира и грехом оставление поющим: / отец наших Боже, благословен еси.

Лучею крови твоя тучу бесовскаго озлобленія изсушил еси, / чудодѣйственнымъ дѣяніемъ потопил еси пламень недугъ и страстей нашихъ, Богоблаженне.

Богородичен:

Закона, Дево, пременила еси естество Божественнымъ Своимъ зачатіемъ, / паче естества родила еси Бога, вопиющимъ: / благословѣнъ Богъ отецъ нашихъ.

Песнь 8

Ирмос: Седмерицею пещь / халдѣйскій мучитель / Божестивымъ неистовно разжжѣ, / силою же лучшею спасены сѣя видеви, / Творцу и Избавителю вопіяше: / отроцы, благословите, / священницы, воспойте, / людие, превозносите во вся веки.

Волнующеся море закланія твоего Божественнымъ окормленіемъ невредно преплыло еси, / зависть тлетворнаго змія глубиною крове твоя, Димитрие, потопил еси, / темъ райская небурная пристанища достигл еси, вопиюще: / отроцы, благословите, священницы, воспойте, людие, превозносите во вся веки.

Не доволенъ бѣше убійца твой о закланіи твоёмъ, / но тщашеся отъ всехъ утаити злое умышленіе свое, / но бысть всемъ яве, / праведнаго же Суда Божія не можѣ избежать.

Псаломскія песни, яко венецъ, въ память твою приносимъ ти, блаженне, / молимъ тя подвигнутися на мольбу къ общему Владыцѣ всехъ, / просити мира миру, градъ же и люди твоя избавити отъ всякихъ бедъ и напастей.

Богородичен:

Гордыню и шатанія, Богородице, низложи и советы неправедныхъ разори, / и зачинающихъ рати погуби, и благоверныхъ десницу возвыси, / да Твой, Пресвятая Дево, праздникъ славимъ.

Песнь 9

Ирмос: Войстинну Богородицу / Тя исповедуемъ, / спасеніи Тобою, Дево Чистая, / съ Бесплотными лики Ты величающе.

Удобренъ добротою страданій твоихъ, / победы на главѣ венецъ нося, на Небо востече яко преудобренъ победитель, / темъ насъ всегда поминай, да ты непрестанно величаемъ.

Твоя к Богу дерзновения проповѣдают бывающая от гроба чудеса твоя, благоверне, / тем и нам свѣше даждь помощь, / уставляюще наша болезни, и поганых шатанія низложи.

О Троице Пресвятая, благоприятно малое сие песнословіе сотвори, / и шүяго мя стоянія на Суде избави, и пленіцу согрешений моих расторгни / молитвами благовернаго Димітрія, да Тя непрестанно величаем.

Богородичен:

Бога рождшая, Дево, / уязвленную грехми душу мою / и вечнаго мя пламени избави молитвами Своими.

Светилен:

Яко цвет краснейший, от благовернаго прозябл еси корене, благочестне Димітріе, / обагрением страдания твоего, яко царскою порфиною, обагрися еси кровію, / тем Божественную ти память любовію творящих от бед спасай.

Слава, и ныне, Богородичен:

Стоящи окрест Тебе, девы Богомудрыя, Богородительнице Маріе, / якоже царевы дщери, Сыну Твоему приведошася, Невесто Лепопречистая, яко Царю всяческих, Егоже, Мати Дево Отроковице, о нас моли.

На хвалитех стихиры, глас 2.

Подобен: Киими похвальными:

Киими духовными похвалами восхвалим благовернаго царевича Димитрія, / законнаго наследника и священнаго собора сына свету и дни, / Ангелом собеседника, первоучеником удобрѣние, / страсготерпцем похвалу святолепную, / иже от благаго корене святое порождение благочестіем сияющаго, / мучеником доброту неборимую, / сосуда Богоизбраннаго Святому Духу, / Емуже молися спасти души наша.

Киими смиренными пѣнии воспойм страсготерпца, незлобиваго птенца, / неповинным заклением непорочну жертву принесшаго себе Бѣгови, / звезду пресветлую, благоверным похвалу благочестивую, / Церквам единомышление и благостояніе, / святителем украшение

святолепное, / христианом славу велехвальную, / Христу молитвенника о душах наших.

Киими недостойными устнами возвеличим благовернаго царевича Димитрия, / егоже Христос прослави чудесными дарованиями / и от различных недуг показа того целителя, / реку чудес неисчерпаемых Христовым пособием и мужеумным смышлением, / крепкаго во бранех помощника, / врагом победителя, бесом прогонителя / и молитвенника о душах наших.

Слава, глас 8:

Приидите днесь, рустии собори, / и видите незлобиваго агнца, / закланнаго неповинно, победоносца Димитрия, / телом убо во гробе положен бысть яко мертв, / душею же на Небесех со Ангелы и мученики ликовствует, / нетленно обретя святое тело его и Богодарованная его чудеса, / емуже поюще возопиём: / страстоносче Христов Димитрие, / смолебники прием Ангельския лики и мученики, / молися Пресвятей Троице верно чтущим тя мир и здравие даровати, / на враги одоление и спасти души наша.

И ныне, Богородичен:

Владычице, прими молитву раб Твоих / и избави нас / от всякия нужды и печали.



**В
ТОЙЖЕ
ДЕНЬ**

**Святаго священномученика Садофа и с ним
128 мученик, при Савории царе в персех**

Тропарь, глас 4: И нравом причастник:

Кондак, глас 4:

Владычню речению усердно в подобстве последова, / яко убо пастырь добрый душу свою за Христовы овцы положил еси, / священномучениче Садофе, молим тя, многострадальне, / моли пастырем начальника Христа / и нас причести деснаго овец стояния, / да воспоем ти: / радуйся, священный отче Садофе, / иже за Христа кровь свою излиывый.